

四庫全書

經部

欽定四庫全書

經部

待軒詩記卷首

詳校官監察御史_臣曹錫寶

通政使司副使_臣莫瞻菴覆勘

欽定四庫全書

經部三

待軒詩記

詩類

提要

臣等謹案待軒詩記八卷明張次仲撰次仲有周易玩辭困學記已著錄是書前載總論二篇其餘國風以一國為一篇二雅周頌以一什為一篇魯頌商頌亦各為一篇大抵用蘇轍之例以小序首句為據而兼採諸家以

會通之其於集傳不似毛奇齡之字字譏彈

以朱子為敵國亦不似孫承澤之字字阿附

併以毛萇為罪人

泉承澤詩經朱傳翼自序稱王弼亂易罪深桀紂毛

氏之罪亦不在王弼之下

故持論和平能消融門戶之見

雖師心揣度或不免臆斷之私而大致援引

詳明詞多有據在近代經解之中猶為曲實

卷末別有述遺一卷有錄無書目下注嗣刻

字蓋欲為之而未成也今併削其目不復虛

列馬乾隆四十六年十月恭校上

總纂官

臣

紀昀

臣

陸錫熊

臣

孫士毅

總校官

臣

陸

費

墀

待軒詩記自序

予向徑行已志不好人諛作書未嘗倩乞序引天性然也讀易之餘閒嘗讀詩為箋注私記所得其大意載總論中序尤可不作或則疑焉因思曩時放廢制義取古來詩文反復吟詠以舒其抑鬱無聊之志窮原於四始究其義蘊因以授之孫訥適延友人沈子起在齋互相闡發子起有類咏予因亦有小箋積久成帙凡八九脫稿乃敢勒為一書倘藏諸家塾傳示子孫後有能讀之

者知予意思所託千載相屬否則長往期至秉畀炎火
令文章還太虛神氣游宇宙亦復曠然自適了無所憾
名根不斷乃為孫輩慇懃付之梓人夫詩自商周溯稷
契訖陳靈上下千五百年治亂興亡風俗疆域形勢方
言物類情變無所不載而吾處數千年後蟲測管窺安
必其皆有合於古人陶主敬曰古韻自詩不用協序文
有本末可非說詩者固不可詘經從序亦何可去序昧
經故以序為本而不能盡信者酌以衆論弋以已志苟

得數行數句有當經學則此數行數句庶可質之將來
勤苦難成昔人所戒垂老讀詩前後紬繹幾二十年日
就澹泊不類年少英雋未知後人以為何如也今神明
衰耗纏綿疴疾旦暮將不起恐剗剗不能親觀厥成此
亦過時之咎矣垂逝之期為日幾何遂命孫訥踵而成
之無隕予志丙辰穀雨日八十八鈍叟張次仲伏枕德
隅書屋口占此為序

待軒詩記序

詩記者鹽官張元祐先生之所為作也先生為世大儒
熹宗朝辛酉舉於鄉屢上春官不第遭時變革遂閉戶
却掃絕迹人事其志節德行蓋在於管幼安邴根矩之
間矣顧其生平經史淹貫著述斐然獨念易為憂患之
書窮年精思榻為之穿而筆為之冢黜九師而翼三聖
集諸儒之大成發中古之幽蘊殆商瞿以來未有之書
至於箋註四詩大抵以序為據謂其書近古異於後之
耳食者囊括注疏以來及於有明一代不敢尋一先生


之語即紫陽義有未洽亦必確有証據不敢苟為雷同
古今得失之林歷代治亂之故忠臣孝子良友貞婦與
夫山川原隰禽魚草木莫不原原本本曉暢意旨不誇
多識不矜異聞有一言之裨於道者未之或遺也此真
可謂明河之在天而珠囊之照地又奚疑焉嗟夫四家
之詩惟毛詩為後出而今習傳者皆毛詩也先生之於
詩學亦在諸儒之後而後之明君察相寶貴是書立於
學宮而役弟子者亦必是書也嗟乎先生之行潔先生

之心苦以謝皋羽鄭所南之蘊義而發揮於經術豈其
有司馬名山之念桓譚必傳之語哉而書之不可廢者
自在也予獲先生忘年交十有五年嘗至齋中見其披
吟不絕於口朱墨不絕於手吾未見有好學如先生者
先生歿後予閱其遺編注釋經傳而外史漢晉唐以迄
有明無不刪述成一家言流覽玩讀未嘗不為流涕其
孫訥受業於予者會刻先生詩記成因作數言於簡端
於乎即先生此書可以不朽矣仁和後學孫治

詩經通譜

華亭楊豫孫著

齊詩 轅固生 夏侯始昌 后蒼



魯詩—浮邱伯—申公

闕門應忌

趙綰

王臧

瑕丘江公—韋賢

韋賞

韋玄成

唐長賓

張長安—張游卿

許晏

王扶

褚少孫

薛廣德—龍共舍

孔安國

徐公—王式

韓詩韓嬰

賁生

趙子

蔡義

食子公

栗豐

張就

王吉


長孫順

髮福

毛詩卜子夏申公毛亨毛萇賁長卿解延年徐敖陳俠

東漢伏恭任末為齊詩包咸高詡魏應為魯詩薛漢召
馴澹臺敬伯為韓詩謝曼卿衛宏賈逵鄭眾馬融鄭玄
皆為毛詩宏作小序齊詩亡於曹魏魯詩亡於西晉韓
詩內傳亡於隋三詩既亡而毛傳獨行蓋大毛公之詩
得之申公申公得之子夏其說多合於金縢儀禮國語
孟子諸書自漢晉以至唐宋皆用其說至鄭樵作毛傳
辨妄始以己意解之朱子集註乃主鄭云鄭玄有詩譜
歐陽公有詩圖皆為十四國世次而作漢志詩六家唐

志二十五家宋志五十三家



欽定四庫全書

待軒詩記卷首

明 張次仲 撰

學詩小箋總論

班固藝文志曰詩言志歌永言故哀樂之心感而歌詠
之聲發誦其言謂之詩詠其聲謂之歌古有采詩之
官王者所以觀風俗知得失自考正也孔子純取周
詩上采殷下取魯凡三百五篇遭秦火而全者以其

諷誦不獨在竹帛故也

經典序錄子夏授魯申公申公授李克克授孟仲子仲子授根牟子根牟子授荀卿卿授毛亨亨授毛萇時人謂亨為大毛公萇為小毛公大毛公魯人小毛公

趙人

東漢儒林傳衛宏字敬仲東海人初九江謝曼卿善毛詩宏從曼卿受學作毛詩序中興後鄭眾賈逵傳毛詩後馬融作毛詩傳鄭玄作毛詩箋隋經籍志先儒

相承謂毛詩序子夏所作毛公及衛敬仲又加潤色
鄭氏詩序辨曰序非一人一世之所能為採詩之官
本其得於何地審其出於何人究其主於何事發端
命題謂大序是當時採詩太史所題明序所作之意
辭顯者簡辭隱者備謂小序是宏誦師說而為之山
堂攷索曰自美刺一言而下意者講師之說或本於
子夏或出於毛公與衛宏之徒非一人之手故其詞
多重複不然則六亡之詩何以止存首句蓋詩之亡

金史卷八十八
者經師不得而見故其序不詳以是攷之則詩序附
益之辭亦皆非漢儒作矣

詩序詩者志之所之也在心為志發言為詩情動於中
而形於言言之不足故嗟歎之嗟歎之不足故詠歌
之詠歌之不足不知手之舞之足之蹈之也情發於聲
聲成文謂之音治世之音安以樂其政和亂世之音
怨以怒其政乖亡國之音哀以思其民困故正得失
動天地感鬼神莫近於詩先王以是經夫婦成孝敬

厚人倫美教化移風俗故詩有六義焉一曰風二曰賦三曰比四曰興五曰雅六曰頌上以風化下下以風刺上主文而譎諫言之者無罪聞之者足以戒故曰風至於王道衰禮義廢政教失國異政家殊俗而變風變雅作矣國史明乎得失之跡傷人倫之廢哀刑政之苛吟咏性情以風其上達於事變而懷其舊俗者也故變風發乎情止乎禮義發乎情民之性也止乎禮義先王之澤也是故一國之事繫一人之本謂之風

言天下之事形四方之風謂之雅雅者正也言王政之所由廢興也政有小大故有小雅焉有大雅焉頌者美盛德之形容以其成功告於神明者也是謂四始詩之至也

鄭康成曰詩之興也諒不於上皇之世大庭軒轅逮於高辛其時有亡載籍亦蔑之焉虞書曰詩言志歌永言聲依永律和聲然則詩之道放於此乎有夏承之篇章泯棄靡有孑遺邇及商王不風不雅何者論功

頌德所以將順其美刺過譏失所以匡救其惡各於
其黨則為法者顯彰為戒者著明周自后稷播種百
穀黎民阻饑茲時乃粒自傳於此名也陶唐之末中
葉公劉亦世修其業以明民共財至於太王王季克
謚顧天文武之德光熙前緒以集大命於厥身遂為
天下父母使民有政有居其時詩風有周南召南雅
有鹿鳴文王之屬及成王周公致太平制禮作樂而
有頌聲興焉盛之至也本之由此風雅而來故皆錄

之謂之詩之正經後王稍更陵遲懿王始受譖烹齊
哀公夷身失禮之後卽不尊賢自是而下厲也幽也
政教尤衰周室大壞十月之交民勞板蕩勃爾俱作
衆國紛然刺怨相尋五霸之末上無天子下無方伯
善者誰賞惡者誰罰紀綱絕矣故孔子錄懿王夷王
時詩託於陳靈公淫亂之事謂之變風變雅以為勤
民恤功服事上帝則受頌聲弘福如彼若違而勿用
則被刦殺大禍如此吉凶之所由憂娛之萌漸昭昭

在斯足作後鑒於是止矣欲知源流清濁之所處則
盡其上下而省之欲知風化芳臭氣澤之所及則旁
行而觀之此詩之大綱也

周之先公太王自豳遷岐修德建業文王繼王季為
西伯典治南國江漢汝旁之諸侯於時天下三分有
二以服事殷故雍梁荊豫徐揚之人咸被德而從之
受命作豐分岐邑周召為旦奭二公采地施先公之
教武王定天下巡狩述職陳誦諸國之詩以觀民風

俗六州得二公之德教尤純故獨錄之屬之太師分
而國之乃棄其餘謂此為風之始所以風化天下故
周公作樂用之鄉人用之邦國女史歌之謂房中之
樂射禮天子騶虞諸侯貍首大夫采蘋士采芣為節
今無貍首周衰諸侯去之孔子錄詩不得也周召之
詩為風之正自此之後南國諸侯政之興衰何以無
變風蓋陳詩將以知其闕失省方設教為黜陟時徐
及吳楚僭王不承天子之風其餘江黃六蓼之屬既

驅陷彼俗又小國猶邾滕紀莒之等其詩蔑而不得
列成王黜殷命伐三監封康叔於衛七世至頃侯當
周夷王時衛國政衰變風始作作者各有所傷從其
國本而異之為邶鄘衛平王以亂徙居東都王城王
室之尊與諸侯無異其詩不能復雅故謂王國之變
風宣王封母弟友於宗周畿內為鄭桓公幽王被殺
桓公死之其子武公與晉文侯定平王於東都又作
卿士國人宜之鄭之變風又作太師呂望封於齊其

子丁公嗣位於王官後五世哀公政衰荒淫怠慢紀
侯譖於周懿王使烹焉齊之變風始作周以魏封同
姓魏君褊急不廣修德秦晉鄰國日見侵削國人憂
之當周平桓之世魏之變風始作成王封母弟叔虞
於唐其子變改為晉至周召共和之時僖侯儉不中
禮國人閔之唐之變風始作皋陶之子伯翳佐禹治
水舜命作虞官賜姓曰嬴周孝王使其末孫非子養
馬汧渭封為附庸邑於秦谷宣王命其曾孫秦仲作

大夫始有車馬禮御之好國人美之秦之變風始作
舜胄虞闕父為周陶正武王賴其器用封其子鳩滿
於陳曰陳胡公五世至幽公當厲王時政衰所為無
度國人傷而刺之陳之變風始作檜祝融氏後周夷
厲之時檜公不務政事而好潔衣服大夫去之檜之
變風始作武王封弟振鐸於曹十一世當周惠王時
政衰昭公好奢而任小人曹之變風始作后稷曾孫
公劉夏后太康時失其官守自郇徙豳修后稷之業

勤恤愛民民咸歸之至商末世太王避難入岐民又
歸之周公避流言居東都思公劉太王居豳之職憂
念民事至苦之功以比序已志太師述其志別其詩
為豳國變風焉周始后稷至於太王王季歷及千載
越異代而別世載其功業為天下所歸文武受命定
天下盛德之隆大雅起自文王至於文王有聲據盛
隆而推原天命上述祖考之美小雅自鹿鳴至魚麗
先其文所以治內後其武所以治外此二雅之次要

於極聖賢之情著天道之助而已又大雅生民及卷
阿小雅嘉魚及菁莪周公成王之時詩也文武周公
道同終始相成比合故為正經其用於樂諸侯以小
雅天子以大雅風既定為鄉樂差次而上小雅為諸
侯樂大雅為天子樂矣大射諸侯之禮所歌鹿鳴三
終下管新宮三終是小雅為諸侯之樂可知然小雅
為天子之政諸侯得用之者詩緣政而作臣無慶賞
威刑之政不得有詩詩為樂章善惡所以勸戒尤美

者可為典法故雖無詩者得進而用之所以風化天下因其節文使之有等故風為鄉樂本諸侯之詩鄉人所用故諸侯進用小雅天子自用大雅矣鄉飲酒燕禮注云鄉樂者風也小雅為諸侯之樂大雅頌為天子之樂是也此舉其正所當用者然而饗賓或上取燕或下就天子不純以大雅諸侯不純以小雅天子饗元侯歌肆夏合文王諸侯歌文王合鹿鳴諸侯於鄰國之君與天子於諸侯同天子諸侯燕羣臣及

聘問之賓皆歌鹿鳴合鄉樂此其著略大校不可得
詳大雅民勞小雅六月之後皆謂變雅美惡各以時
亦顯善懲過正之次也周室成功太平德洽於是和
樂興焉頌聲乃作祭帝於郊所以定天位祀社於國
所以列地利祖廟所以本仁山川所以備鬼神五祀
所以本事故自郊社祖廟山川五祀義之修禮之藏
也聖王法象天地羣神而為之政政成而神得其所
則事順人和而德洽於神矣功大如此可不美報乎

故人君必齋明而薦之歌之舞之所以顯神明昭至德也周公歸政成王封其元子伯禽於魯其後政衰國事多廢十九世至僖公遵伯禽之法修泮宮守禮教會諸侯謀東略修廟牧圉國人美其功季孫行父請命於周而作頌孔子錄其詩同於王者之後舜舉契為司徒有五教之功賜姓而封之十四世至湯受命伐夏定天下後有中宗天命自度治民祇懼高宗嘉靖殷邦小大罔怨時有作詩頌之者商德之壞武王

封微子宋公為商後自後政衰散亡商之禮樂七世
至戴公時當宣王正考父校商名頌十二篇於周太
師歸以祀其先王孔子錄詩得五篇而已乃列之頌
著為後王之義監三代之成功法莫備於是矣周太
師何由得商頌周用六代之樂故有之

孔仲達曰夫詩者論功誦德之歌止僻防邪之訓雖無
為而自發乃有益於生靈六情靜於中百物盪於外
情緣物動物感情遷若政遇醇和則歡娛被於朝野

時當慘黷亦怨刺形於咏歌作之者所以暢懷舒憤
聞之者足以塞違從正發諸情性諧于律呂故曰感
天地動鬼神莫近於詩詩之為用其利大矣若夫哀
樂之感冥於自然喜怒之端非由人事故燕雀表啁
噍之感鸞鳳有歌舞之容然則詩理之先同夫開闢
詩迹所用隨運而移上皇道實故諷諭之情寡中古
政衰亦謳歌之理切唐虞乃見其初羲軒莫測其始
於後時經五代篇有三千成康沒而頌聲寢陳靈輿

而變風息先君宣父釐正遺文緝其精華褫其煩重
上從周始下暨魯僖四百年間六詩備矣卜商闡其
業雅頌與金石同和秦政燎其書簡牘與烟塵共盡
漢氏之初詩分為四申公騰芳於鄢郢毛氏光價於
河間貫長卿傳之於前鄭康成箋之於後晉宋二蕭
之世其道大行齊魏兩河之間茲風不墜近世為義
疏者有全緩何胤舒瑗劉軌思劉醜劉焯劉炫等然
焯炫輩負恃才氣輕鄙先達同其所異異其所同或

應略而反詳或應詳而更略準其繩墨差忒未免勘
其會同時有顛躓今則削其所繁增其所簡惟意存
於曲直非有心於愛憎庶以對揚聖範垂訓幼蒙故
叙其所見載於卷首云爾

王魯齋曰夫書授於伏生之口止二十有八篇參之以
孔壁之藏又二十有五篇然其亡失終不可復見者
猶有四十餘篇其存者且不勝其錯亂訛舛為萬世
之深恨今不知詩之為經藏於何所乃如是之祕傳

於何人乃如是之的遭焚禁之大禍而三百篇之目
宛然如聖人之舊無一篇之亡一章之失詩書同禍
而存亡之異遼絕乃如此漢初最善復古齊韓魯三
家之詩並列於學官惟毛萇最後出而獨行於北海
鄭康成北海人也故為之箋自是後學者雖不識毛
萇而篤信康成故毛詩假康成之重而排迤三家獨
得盛行於世毛鄭既孤行而三家牴牾之迹遂絕而
不得參伍錯綜以訂其是非且萇自謂其學傳於子

夏按子夏少夫子四十一歲至漢已三百年焉在其
為得於子夏哉若傳於子夏之門人則流派相承其
姓氏不應湮沒而乃詭託授受以誑後世耶陸璣雖
撰毛公相傳之序上接子夏而又與釋文無一人合
愚是以於毛詩不能不疑也

陸氏鈇曰三家之詩唐人已失其傳雖有存焉者譌矣
毛詩固未嘗亡也後世經生尋陸緒之三家不啻珠
璧棄未亡之毛氏直如弁屣何哉毛氏行而三家廢

君子慨已惜之集傳出而毛氏之學寔微又奚為莫之慨也夫去古近者言雖蹟而似真離聖遠者說雖詳而易淆故曰豕尺雖斷可定鍾律毛氏殆未可輕此言也

葉石林曰六經自秦火後獨詩以諷誦相傳韓詩既出於人之諷咏而齊魯與燕語音不同訓詁亦異故其學往往多乖獨毛之出也自以源流得於子夏而其書貫穿先秦古書其釋鵠鵠也與金縢合釋北山烝

民也與孟子合釋昊天有成命與國語合釋碩人清
人玄鳥皇矣與左傳合而序由庚等六章與儀禮合
蓋當毛氏時左氏未出孟子國語儀禮未甚行而學
者亦未能信也惟河間獻王博見異書推崇尊信迨
至晉宋諸書盛行肄業者衆而人始翕然知其說近
正且左氏等書漢初諸儒皆未見而毛說先與之合
不謂之源流子夏可乎

鄭漁仲曰衛宏之序有專取諸書之文至數句者有雜

取諸家之說而辭不堅決者有委曲宛轉附經以成其義者情動於中而形於言言之不足故嗟歎之其文全出於樂記成王未知周公之志公乃為詩以貽王其文全出於金縢自微子至於戴公其間禮樂廢壞其文全出於國語古者長民衣服不貳從容有常以齊其民其文全出於公孫尼子則詩序之作實在於數書既傳之後明矣所謂取諸書之文有至數句者此也關雎之序既曰風之始也所以風天下而正

夫婦也意亦足矣又曰風風也風以動之上以風化
下下以風刺上又曰一國之事繫一人之本謂之風
載馳之詩既曰許穆公夫人閔其宗國顛覆而作又
曰衛懿公為狄所滅絲衣之詩既曰繹賓尸矣又曰
靈星之尸此蓋衆說並傳衛氏得其美辭美意併錄
而不忍棄之此所謂雜取諸家之說而辭不堅決者
也騶虞之詩先言人倫既正朝廷既治天下純被文
王之化而後繼之蒐田以時仁如騶虞則王道成行

葦之詩先言國家忠厚仁及草木然後繼之以內睦九族外尊黃耆養老乞言此所謂委曲宛轉附經以成其義者也

馬貴與曰予讀國風諸篇而後知詩之不可無序序之有功於詩也蓋風之為體比興之辭多於敘述諷諭之意浮於指斥有反覆咏歎聯章累句而無一言叙作者之意而序者乃一言以蔽之曰為某事也苟非其傳授之有源探索之無舛則孰能臆料當時指意

之所歸以示千載乎試觀采芣之序以婦人樂有子
為后妃之美也而其詩語不過形容采掇芣苢之情
狀而已黍離之序以為閔周室宮廟之顛覆也而其
詩語不過慨歎禾黍之苗穗而已此詩不言所作之
意而賴序以明者也若舍序以求之其所以采掇者
為何事慨歎者為何說乎叔于田之二詩序以為刺
鄭莊公也而其詩語則鄭人愛叔段之辭耳揚之水
椒聊二詩序以為刺晉昭公也而其詩語則晉人愛

桓叔之辭耳此詩之序其事以諷初不言刺之意而賴序以明者也若舍序以求之四詩非子雲美新之賦則袁宏九錫之文爾是豈可以訓而夫子不刪之乎鵠羽陟岵之詩見於變風序以為征役者不堪命而作也四牡采薇之詩見於正雅序以為勞使臣遣戍役而作也而深味四詩之旨則歎行役之勞苦叙饑渴之情狀憂孝養之不遂悼歸休之無期其辭語一耳此詩之辭同意異而賴序以明者也若舍序

以求之則文王之臣民亦怨其上而四牡采薇不得
為正雅矣即是數端觀之則知序之不可廢序不可
廢則桑中溱洧何嫌其為刺奔乎蓋嘗論之均一勞
苦之詞也出於叙情閔勞者之口則為正雅而出於
困役傷財者之口則為變風也均一淫佚之詞也出
於奔者之口則可刪而出於刺奔者之口則可錄也
均一愛戴之詞也出於愛叔段桓叔者之口則可刪
而出於刺鄭莊晉昭者之口則可錄也夫采芣采芣離

之不言所謂叔于田揚之水之反辭以諷晦菴亦既如序者之說求作詩之意於詩辭之外矣何獨於鄭衛諸篇必以為奔者所自作使聖經為錄淫之具乎且詩之可刪孰有大於淫者今以文公詩傳考之如桑中溱洧月出東門之墀東方之日東門之池東門之楊序以為刺淫而文公以為淫者所自作如靜女木瓜采芣丘中有麻將仲子遵大路有女同車山有扶蘇擇兮狡童褰裳丰風雨子衿揚之水出其東門

野有蔓草則序本別指他事而文公亦以為淫者所
自作夫以淫昏不檢之人發而為放蕩無恥之辭夫
子猶存而不刪則不知所刪者果何等篇也或曰晦
菴之說謂春秋所記無非亂臣賊子之事蓋不如是
無以見當時事變之實而垂鑒於後世故不得已而
存之也愚又以為未然夫春秋史也詩文辭也史所
以紀事世之有治不能無亂則固不容存禹湯而廢
桀紂錄文武而棄幽厲也至於文辭則其淫哇不經

者直刪之而已且羞惡之心人皆有之今市井小人
有能道其宣淫之狀指其行淫之地則未有不面頰
發赤且慚且諱者則知禁之使不為不若愧之使自
知其不可之為愈此鋪張揄揚之辭所以為閔惜懲
創之至也此詩之訓也然愚之所論不過求其文意
之指歸而知其得於性情之正耳至於被之絃歌合
之音樂則儀禮左傳所載古人歌詩合樂之意盖有
不可曉者夫闕雝鵲巢閨門之事后妃夫人之詩也

而鄉飲酒燕禮歌之采蘋采芣夫人大夫妻能主祭之詩也而射禮歌之肆夏繁遏渠宗廟配天之詩也而天子享元侯歌之文王大明緜文王興周之詩也而兩君相見歌之以是觀之其歌詩之用與詩人作詩之本意盖有判然不相合者不可強通也則烏知鄭衛之詩不可用於燕享之際乎左傳載列國聘享賦詩固多斷章取義然其大不倫者亦以來譏如鄭伯有賦鶉之奔奔楚令尹子圍賦大明及穆叔不拜

肆夏甯武子不拜彤弓之類是也然鄭伯如晉子展
賦將仲子鄭伯享趙孟子太叔賦野有蔓草鄭六卿
餞韓宣子子蘧賦野有蔓草子太叔賦褰裳子游賦
風雨子旗賦有女同車子柳賦擇兮此六詩皆文公
所斥以為淫奔之人所作也然所賦皆見善於叔向
趙武韓起不聞被譏乃知鄭衛之詩未嘗不施之於
燕享而此六詩之旨意訓詁當如序者之說不當如
文公之說也文公舍序以言詩則變風諸篇祇見其

理短而辭哇但以經傳所引逸詩攷之則其辭明而理正未見其劣於三百五篇也而何以刪之三百五篇之中如詆其君以碩鼠狡童如欲刺人之惡而自為彼人之辭以陷於所刺之地幾不可訓矣而何以錄之蓋深味聖人之言而得其意矣昔夫子之言曰述而不作又曰多聞闕疑嘗舉史闕文之語而歎世道之不古存夏五郭公之書而不欲遽正前史之誤則聖人之意蓋可見矣詩之見錄者必其序說之明

白而意旨之可攷者也其逸而不錄者必其序說之失傳旨意之難攷而不欲臆說者也今三百五篇所存之序雖自毛衛諸公而傳其旨意則自有此詩而已有之矣鴟鴞之序見於尚書碩人載馳清人之序見於左傳所紀皆與作詩者同時非後人之臆說也若序說之意不出於當時作詩者之口則鴟鴞諸章初不言成王疑周公之意清人終篇亦不見鄭伯惡高克之迹後人讀之當不能曉其為何語矣嘗妄為

之說曰作詩之人可攷其意可尋則夫子錄之殆述而不作之意也其人不可攷其意不可尋則夫子刪之殆多聞闕疑之意也使序詩之意果不出於作詩之初而皆為後人臆度之說則比興諷詠之詞其所為深微幽深者殆類東方朔聲誓尻高之隱語蔡邕黃絹幼婦之廋辭使後人各出其智以為猜料之工拙恐非聖經誨人之意也或曰諸小序之說固有舛馳鄙淺而不可解者可盡信之乎愚曰序非一人之

言也或出於國史之采錄或出於講師之傳授如渭陽之首尾異說絲衣之兩義並存其舛馳固有之擇善而從之可矣至如辭語鄙淺則序所以釋經非作文也祖其意足矣後之君子欲盡廢序以言詩此愚所以未敢為然復撫述而不作多聞闕疑之言以明孔子刪詩之意且見古序之尤不可廢也

許敬菴曰三百篇皆本無邪之思故可興觀羣怨有裨人倫風化禮樂名物史記云古者詩三千餘篇孔子

去其重取可施於禮義上采契后稷中述殷周之盛
至幽厲之缺始於衽席故曰闕雖之亂以為風始鹿
鳴為小雅始文王為大雅始清廟為頌始三百五篇
孔子皆絃歌之以求合韶武雅頌之音禮樂自此可
得而述由是觀之孔子刪定詩篇皆可施於禮義合
於韶武雅頌之音其思無邪可知也朱子云詩言善
者可以感發惡者可以懲創彼惡者思既邪矣讀詩
者即有意於懲創安得遽謂之無邪思耶孔子告顏

淵曰放鄭聲鄭聲淫又曰惡鄭聲之亂雅樂也樂記
曰鄭衛之音亂世之音也比於慢矣鄭衛之音孔子
固惡之然而其國之君臣之間代有仁人賢者詩之
發乎情而止乎禮義者自在孔子刪其邪僻錄其醇
雅列於國風所謂淫與慢者不存矣朱子蓋主淫慢
之說而於二國風之中但辭有不純者即釋之為淫
奔為男女私相贈答及考之小序俱有不然序所由
來久矣漢初齊魯韓三家皆立博士河間獻王好毛

氏之學至平帝時立博士毛公自言本於子夏以其
學授同國貫長卿傳解延年延年授徐敖傳九江陳
俠俠授同國謝曼卿傳東海衛宏中間雖有傳會增
益未盡無據也如衛風木瓜鄭風將仲子有女同車
蓀兮褰裳等篇序各有指或美齊桓或刺鄭莊或刺
忽之辭昏而無大國之助或刺公子爭立而思大國
之正至於刺淫諸篇如匏葉桑中鶉奔蝮螭之類序
言其事而思所以正之亦一時君子閔時悼俗之所

為作也今以詩義求之似皆可信春秋諸賢賦鄭詩見志義有取爾也而肯取淫慢之辭耶凡人之性情不約以正即謂之淫故樂記曰鄭音好濫淫志不必男女相奔之謂使鄭詩為淫奔所作安見為無邪耶且詩與音聲不同詩者志發於言載在篇章者也聲謂宮商角徵羽音謂金石絲竹匏土革木樂之節奏度數由之靡靡之樂令人心意蕩溢不能自禁散玩而無檢束故曰其聲淫不言其詩淫也其音慢不言

其詩慢也。如因鄭聲淫等語，遂以鄭詩為淫詩，則所亂雅樂者，即是大小雅耶？恐亦未盡然也。則序未可廢也。詩經秦火，篇章豈無脫誤？觀鄭衛及王齊陳諸國風，朱子所指為淫者，僅三十餘篇。王魯齊謂今詩豈盡聖人所定？容或所刪之詩有存於閭巷，浮薄之口者。而漢儒取以補亡耳。王陽明亦謂鄭衛之音，必秦火而後世儒搜採以足三百之數者，不為無見。大抵漢儒尊經詳於訓詁，或失之傳會。而朱子釋經過

於主張反或有晦於經旨魯齋陽明二先生知求聖人之大旨而又未嘗參討經傳之說均之有所未盡愚故詳為論述以俟後之君子折衷焉

顧鄰初曰詩之有序猶聽訟之有證驗也證驗必於其人與世之近者求之鄭康成謂子夏序詩篇義合編毛公作傳各引其序冠之篇首是康成在漢蓋親見也去古未遠源流有自猶不足信而用已見懸度是將奚据哉左氏記季札之觀樂也所歌者邶鄘衛鄭

皆在焉使其為里巷狹邪所用周樂惡得有之魯之
樂工又何自取異國淫邪之辭肆之於韶夏護武間
也擊鼓二子乘舟定之方中碩人載馳木瓜清人南
山黃鳥株林鷓鴣東山彤弓抑戒時邁思文武酌等
詩序意可證於尚書左傳國語是序非後人之臆說
也如鄭之六卿皆賦本國之詩於燕享出餞之際假
令盡非序而為淫奔所作豈有兩國君卿大夫相見
乃自歌其里巷狹邪之淫辭以黷媒俎豆下伍伶諷

者哉士君子生千載之後讀古人書政自未易詩多
微辭尤難臆決要在衷諸理而是質諸心而安耳

孔仲達曰包管萬慮其名曰心感物而動乃呼為志志
之所適外物感焉言悅豫之志則和樂興而頌聲作
憂愁之志則哀傷起而怨刺生故志蘊藏在心發見
於言乃名為詩情動於心志之中見於初言之時直
平言之耳言未申志故咨嗟歎息反覆引長至於手
舞足蹈而後得舒其情故詩必長歌也哀樂之情發

見於言語之聲未有宮商之調至於作詩之時次序
清濁節奏高下使五聲為曲似五色成文被諸管絃
名之為樂原夫作樂之始樂寫人音人音有小大高
下之殊樂器有宮商徵羽之異依人音而制樂託樂
器以寫人是樂本效人人非效樂人之作詩成樂之
文聲能寫情情皆可見聽音而知治亂觀樂而曉盛
衰故神瞽有以知其趣也若夫取彼素絲織為綾縠
或色美而材薄或文惡而質良惟善賈者別之取彼

歌謠播為音樂或辭是而意非或言邪而志正惟達
樂者曉之若徒取辭賦不達音聲則身為桀紂口言
堯舜不可得而知也是以楚茨大田之徒並陳成王
之善行露汝墳之篇皆述紂時之惡以汝墳為王者
之風楚茨為刺過之雅太師曉其作意知其本情故
也情見於聲聲隨世變故治世政教和順民心安化
則和樂而作歌如湛露天保之類亂世政教乖戾民
怨其上則怨怒而作歌如巷伯十月之類滿志縱慾

兵後不息國將滅亡民遭困厄則哀已思古而作歌
如大東莒華之類詩述民志樂歌民詩故時政善惡
見於音也哀樂出於民情樂音從民而變是人能變
樂非樂能變人而樂之感人移風易俗廉直莊誠之
音作而民肅敬寬裕順成之音作而民慈愛流僻邪
蕩之音作而民淫亂是樂由王者所制民逐樂音而
變兆民既衆賢愚不等采詩定樂以賢者所樂教愚
者為樂取智者之心變不智者之心先王制禮之事

亦猶是也禮樂本出於民還以教民與夫雲出於山
復雨其山火生於木反焚其木復何異哉地理志云
民有剛柔緩急音聲不同繫水土之風氣謂之風好
惡取舍動靜隨君上之情欲謂之俗風為本俗為末
聖王統理人倫必移其本而易其末然後王教成皆
用詩為之

詩播於音音從政變著為樂章精誠相感陳得失以
為勸戒誠能用詩之善道聽嘉樂之正音予善伐惡

舉無不當可使天地效靈鬼神降福也臣下作詩所以諫君君上用詩所以化下合於宮商相應之文而不直言其過使知過而悔感而不切微動若風風行草偃雖論功誦德莫不正邪防失此作詩之意耳託之樂歌依違而諫者詩人之權也

典法仍存廢而不行非無政教施之失理則國異政家殊俗皆王道衰之事而變詩作者未識不善不知善為善未見不惡不知惡為惡太平則無所更美道

絕則無所復譏人情之常理也故初變惡俗則民歌
之風雅正經是也始得太平則民頌之周頌諸篇是
也若其王綱解紐禮義消亡民皆逃死政盡紛亂易
稱天地閉賢人隱於此時也雖有智者無復譏刺成
康太平之後其美不異於前故頌聲止也陳靈淫亂
之後其惡不復可言故變風息也班固云成康沒而
頌聲寢王澤竭而詩不作此之謂也然則政教初失
尚可匡而革之追而復之故執彼舊章繩此新失覲

望自悔其心更遵正道所以變詩作也周道之衰自夷懿始而無夷懿之雅者孔子錄而不得或有而不足錄也所以能作變詩者曉達世事之變易若唐有帝堯殺禮救危之化後世習之失於儉不中禮陳有大姬好巫歌舞之風後世習之失於遊蕩無度既見時世之事改變舊時之俗故依準舊法若齊太公之風衛康叔之化其遺風仍在詩人之懷故作詩而戒之雖俱準舊法而詩體不同或陳古政治或指世淫

荒雖復屬意不同而俱懷匡救故變詩所陳皆亂政
亡形時政之疾病也所言皆忠規切諫救世之鍼藥
也疾病尚輕有可生之道則醫之治也用心銳扁鵲
之療太子知其必可生也疾病已重有將死之勢則
醫之治也用心緩秦和之視平公知其不可為也詩
人救世亦猶是矣典型未亡覲可追改則箴規之意
切鶴鳴沔水殷勤而責王也淫風大行莫之能救則
匡諫之志微秦洧桑中所以咨嗟歎息而閔世匡諫

志微知其國將亡也

詩之所言一人之心乃一國之心覽一國之意以為已心其取義者一國之事係此一人言之言諸侯之政化於一國以其狹故也總天下之心以為已意而咏歌王政得失道天下之事閔風俗之衰言天子之政施於天下以其廣故也一人美則人皆美之一人刺則人皆刺之谷風黃鳥妻怨其夫未必一國之妻皆怨夫也北門北山下怨其上未必一朝之臣皆怨

上也但舉夫婦離怨則知風俗敗矣言獨勞從事則知政教偏矣莫不取衆意以為已辭假使聖哲之君功齊區宇設有一人獨言其惡如卞隨務光之羞見殷湯伯夷叔齊之恥事周武海內之心不之同也無道之主惡加萬民設有一人獨稱其善如張竦之美王莽蔡邕之惜董卓天下之意不之與也必言當舉世之心動合一國之意然後得為風雅載在篇章不然國史或錄其文聖人不存其言也天子以政教齊

正天下故述天子之政還以齊正為名皆正天下之
大法文武用之則興幽厲不用則廢雅言王政廢興
故有美刺也易稱聖人擬諸形容象其物宜天子之
政教可美之形容營造之功畢也天之所營在於命
聖聖之所營在於任賢賢之所營在於養民民安而
財豐衆和而事節羣生盡遂其性萬物各得其所即
成功之驗也物本於天人本於祖天之所命者牧民
也祖之所命者成業也民安業就須告神明使知雖

社稷山川四嶽河海皆以民為主欲民安樂故作詩
歌功徧告神明所以報神恩也王者政有興廢未嘗
不祭羣神但政未太平則神無恩力故太平德洽始
報神功頌述祭祀之狀不言得神之力但美祭祀報
德可知耳鄭氏答張逸云風也小雅也大雅也頌也
此四者人君行之則為興廢之則為衰箋云王道興
衰之所由然則此四者人君興廢之始故謂之四始
詩理至極盡於此也

鄭漁仲曰詩之本在聲聲之本在興鳥獸草木乃發興之本漢儒之言詩者既不論聲又不知興故鳥獸草木之學廢詩曰關關雎鳩在河之洲不識雎鳩則安知河洲之趣與關關之聲乎凡雁鷺之類其喙扁者則其聲關關雞雉之類其喙銳者則其聲鷺鷥此天籟也雎鳩之聲似鳬雁故其聲如是又得水邊之趣也小雅曰呦呦鹿鳴食野之苹不識鹿則安知食苹之趣與呦呦之聲乎凡牛羊之屬有角無齒者則其

聲呦呦駝馬之屬有齒無角者則其聲蕭蕭亦天籟也鹿之聲似牛羊故其聲如是又得蔓蒿之趣也使不識鳥獸之情狀則安知詩人闕闕呦呦之興乎曰有敦瓜苦烝在栗薪者謂瓜苦引蔓於籬落間而有敦然之繫焉曰桑之未落其葉沃若謂桑葉最茂雖未落之時而有沃然之澤使不識草木之精神則安知詩人敦然沃若之興乎陸璣為毛詩作鳥獸草木蟲魚疏然璣本無此學其門人輩互相附和多是支

離惟爾雅一種其書最古為名物之宗然孫炎郭璞
所得既希張揖孫憲所記徒廣大抵儒生家多不識
田野之物農圃人又不知詩書之旨二者無由參合
遂使鳥獸草木之學不傳

文章之體有史傳之文有歌詠之文史傳之文以實
錄為主秋毫之善不私假人歌詠之文揚其善而隱
其惡大其美而張其功後世於歌詠之文求之太過
直以史視之則非矣蓋善觀詩者當推詩外之意如

孔子子思善論詩者當推詩外之理如子貢子夏善學詩者當取一二言為立身之本善引詩者不必分別所作之人所採之詩如諸經所援引之詩可也縣蠻黃鳥止于丘隅不過喻小臣擇卿大夫有仁者依之夫子推而至於為人君為人父鳶飛戾天魚躍于淵不過喻惡人遠去而民樂得其所子思推之上察乎天下察乎地觀詩如此尚何疑乎如切如磋如琢如磨子貢達於貧富之間巧笑倩兮美目盼兮子夏

悟於禮後之說論詩若此又何疑乎南容三復不過
白圭子路終身之誦不過不忤不求學詩至此何以
多為維嶽降神生甫及申宣王詩也夫子以為文武
之德夙夜匪懈以事一人仲山甫詩也左氏以為孟
明之功小宛幽王詩也祭父以為文王戎狄是膺僖
公詩也孟子以為周公矢其文德洽此四國記禮者
以為三代之君引詩若此奚必分別所作之人所採
之詩乎達是說然後可以言詩也不然周餘黎民靡

有子遺信其無遺民矣崧高維嶽峻極於天信為極
天矣善乎孟子之說詩也民之秉彝好是懿德孟子
釋之曰民之秉彝也故好是懿德未嘗費詞而理自
明何彼穠矣平王以後之詩也注謂武王之詩而以
平王為平正之王齊侯為齊一之侯按春秋莊公元
年書王姬歸于齊乃桓王女平王孫下嫁於齊襄公
故詩曰齊侯之子平王之孫斷無可疑周頌作於康
王成王之世故稱成王康王今毛鄭以頌皆成王時

作不得稱成王康王故昊天有成命云成王不敢康
為成此王功不自安逸執競之不顯成康謂成大功
而安之噫嘻之成王謂成是王事惟以召南為文武
之詩故不得不以平王為平正之王惟以周頌為成
王時作故不得不以成王為成此王功也殊不知詩
中此類甚多召南中有康王以後之詩有平王以後
之詩不特文武時也甘棠行露美召公於既沒之後
在康王世也何彼穠矣作於平王以後亦猶是也不

必謂武王時詩大雅中之稱文王皆後世詩人追詠之詞何嘗作於文王之世周頌之美成王亦猶是也不必謂成王時作毛鄭解經不能無失孰有大於此者

詩有美刺作於文武成康之世謌詠太平而不顯作者之名况刺詩當王室衰微諸侯橫恣譏訶醜亂之跡暴揚帷薄之私則其隱匿姓名宜愈甚矣是以作詩者不明著其人亦不直指其事惟節南山刺幽王

也則曰家父作誦以究王訕巷伯寺人傷讒而作也
則曰寺人孟子作為此詩祈父曰祈父予王之爪牙
崧高烝民曰吉甫作誦明著其所作之人其他諸詩
有美刺者不可以言語求觀其意可矣故其譏刺是
人也不言其所為之惡而言其爵位之尊服飾之美
而民疾之以見其不堪君子偕老副笄六珈赫赫師
尹民具爾瞻是也其頌美是人也
不言其所為之善
而言其冠佩之華容貌之盛而民安之以見其無愧

緇衣之宜兮敝予又改為兮服其命服朱芾斯皇是也

風有正變仲尼未嘗言而他經不載獨出於詩序皆以美者為正刺者為變則邶鄘衛之詩謂之變風可也緇衣之美武公駟鐵小戎之美襄公亦可謂之變乎必不得已從先儒正變之說則當如穀梁之書所謂變之正也穀梁之春秋書築王姬之館於外書春秋盟於首戴皆曰變之正也蓋言事雖變常而終合

之正也河廣之詩曰誰謂河廣一葦杭之其欲往之心如其銳也然有舍之而不往者大車之詩曰穀則異室死則同穴其男女之情如其至也然有畏之而不敢者氓之詩曰以爾車來以我賄遷其淫佚之行如其醜也然有反之而自悔者此所謂變之正也序謂變風者見王澤雖衰人猶能以禮義自防也見中人之性能以禮義自閑雖有時而不善終蹈乎善也見其用心之謬行己之乖倘返而為善人則

聖人亦錄之而不棄也先儒所謂風之正變如是胡
文定謂邶鄘以下多春秋詩而謂詩亡然後春秋作
何也秦離降為國風而王者之詩亡矣春秋始隱公
適當詩亡之後謂詩亡者雅詩亡也予謂不然春秋
作於獲麟之時乃哀公十四年詩亡於陳靈公乃孔
子未生之前故曰詩亡而褒貶之書作矣非有定義
也蘇頌濱曰陳靈之後未嘗無詩而仲尼有所不取
詩作於思慮之不能自己當其盛時人心和樂而不

流發而為詩無有不善今之正詩是也及其衰也有
所憂愁憤怒不得其平淫佚放蕩不合於禮者猶知
復反於正故其為詩亂而不蕩今之變詩是也及其
大亡也怨君思叛越禮忘返則其詩遠義而無所歸
嚮故曰變風發乎情民之性也止乎禮義先王之澤
也先王之澤尚存而民心之邪未勝猶有取焉以為
變詩及其邪心大行禮義日遠則詩淫而無度不可
復取故詩止於陳靈非天下之無詩也有詩而不可

為訓焉耳

陳君舉謂春秋之衰以禮廢秦之亡以詩廢嘗觀之
詩刑政之苛賦役之重天子諸侯朝廷之嚴后妃夫
婦衽席之秘聖人存其詩使天下匹夫匹婦皆得以
言其上宜若啓天下輕君父之心然亟諫而不悟顯
戮而不戾相與攜持去之而不忍是故湯武之興其
民急而不敢去周之衰其民哀而不忍離蓋其抑鬱
之氣舒而無聊之意不蓄也至詩不敢作而天下怨

極矣卒不能勝共起而亡秦秦亡而後快於是匹夫匹婦有存亡天下之權嗚呼春秋之衰以禮廢秦之亡以詩廢吾固知公卿大夫之禍速而小民之禍遲而大詩者正所以維持君臣之際其功用深矣

樂以詩為本詩以聲為用仲尼編詩為燕飲饗祀之用而非專用以說義也自齊魯韓毛四家各為序訓以說相高漢朝又立之學官以義理相授遂使聲歌之音湮沒無聞漢初去三代未遠瞽史之徒例能歌

也東漢之末禮樂蕭條聲歌之樂斬然矣曹孟德平
劉表得漢雅樂郎杜夔夔老矣又不肄習所得者惟
鹿鳴騶虞伐檀文王四篇而已太和末又失其三左
延年所得惟鹿鳴一篇耳按樂有四節曰升歌曰笙
入曰間歌曰合樂每節三終通之為十二而謂之九
成者升歌笙入共為九成也升歌者工升自西階歌
鹿鳴四牡皇華每一篇一終三終則主人酌獻獻工
笙入者入於堂下奏南陔白華華黍亦一篇一終三

終主人亦酌獻笙歌畢堂上堂下更代而作為間歌
堂上先歌魚麗則堂下笙由庚次歌嘉魚則笙崇丘
又次歌南山有臺則笙由儀為三終歌者在上貴人
聲也合樂者謂堂上堂下歌瑟及笙並作也工歌闕
睢則笙吹鵲巢合之歌葛覃則吹采芣繫合之歌卷耳
則吹采蘋合之如此皆備工以樂備告樂正樂正告
於客而遂出首尾相承節奏有屬知古詩之聲為可
貴也至晉鹿鳴一篇又絕無傳後世不復聞詩歌矣

王魯齋曰近世儒者謂義理之說勝而聲歌之學日微
古人之詩用以歌非以說義也其為說主聲而不主
義如此則雖鄭衛之聲可薦於宗廟天作清廟可奏
於宴飲之間是謂舍本而逐末矣凡歌聲悠揚於喉
吻而沁入於心思正以其義焉耳苟不主義則歌者
以何事而聽者有何味豈足以蒸變人之氣質鼓動
人之志氣哉尚書曰詩言志歌永言聲依永律和聲
樂乃為詩而作非詩為樂而作也

程泰之曰南雅頌樂名也南有周召頌有周魯商本其所從得而還以繫其國土也二雅獨無所繫以其純當周世無所標別也均之為雅音類既同又自別為大小則聲度必有豐肉廉殺亦如十二律然既有大呂又有小呂也若夫邶鄘衛十三國者詩皆可採而聲不入樂則直以徒詩著之本土春秋諸侯卿大夫士賦詩道志者凡詩雜取無擇至考其入樂則自邶至豳無一詩在數宴享之用鹿鳴鄉飲酒之笙由庚

鵲巢射之騶虞采蘋諸如此類未有或出南雅之外者然後知南雅頌之為樂詩而諸國之為徒詩也

鄭室甫曰笙詩有聲有辭如無其辭則不曰笙詩矣燕禮升歌鹿鳴下管新宮新宮今亡宋公享叔孫昭子賦新宮將謂管亦有聲無辭耶其謂斯干為新宮者非也笙詩之亡猶管詩之亡也書曰琴瑟以詠笙鏞以間詩曰鼓瑟吹笙吹笙鼓簧皆有詩也歌詠之聲依之律和之自后變以來未之有改也故樂首節升

歌比歌以瑟二節笙入輔笙以磬三節間歌歌笙相
禪四節合樂歌笙相合以南衆聲偕作於是工告樂
正曰正歌備皆謂之歌而可謂之無辭耶凡樂四節
為詩十八篇皆有聲有辭先之以雅終之以南故關
雎雖為風始以合樂在間歌之後則末也故曰關雎
之亂

何黃如曰書斷於穆春秋始於平中間若厲宣幽三王
之際皆周室改革之大者而其事跡杳如也舍詩將

安所徵之故詩者聯屬書與春秋之隙者也孟子曰王者之迹熄而詩亡詩亡然後春秋作諸儒推測未
有得其解者也今以世考之詩亡於下泉正當敬王
之時春秋之作適有感是時耳蓋至是而周不復興
矣平遷王城敬遷下都愈趨愈下聖人所以投筆而
自廢也聖人之刪書也其心猶以王為未足也曰必
如帝者斯可矣刪詩則不及帝矣而其大指所在特
惓惓屬望於中興曰孰能如夏之少康殷之盤庚武

丁者乎故於二代之書獨有取三君之世此尤足見春秋託始平王之意也

歐陽永叔曰六經焚於秦火自漢以來收拾亡逸正其謬謬得以粗備者豈止一人之力後之學者徒抱焚餘殘脫之經俵俵於去聖千百年後不見先儒之說而欲特立一家之學吾未之信也先儒之論苟非詳其終始而牴牾質諸聖人而悖謬不得已而後改易者又何必徒立異論以相訾也

今之學詩而罕有得焉者何哉勞其心而不知其要
逐其末而忘其本也何謂本末觸事感物文之以言
善則美惡則刺發其揄揚怨怒於口道其哀樂喜怒
於心此詩人之意也其本也採而錄之正其名次別
其義類彼此分繫用之宗廟朝廷下至鄉人聚會此
太師之職也其末也刪其繁重察其美刺著其善惡
以為勸戒者聖人之志也此本也整齊殘缺以為義
訓或遷就其事以曲成已學其於聖人之志有得有

失此經師之業也求詩人之意達聖人之志者經師之本也講太師之職因其失傳而妄自為之說者經師之末也今夫學者得其本而通其末斯盡善矣得其本而不通其末闕其所疑可也今夫學者知前事之善惡知詩人之美刺知聖人之勸戒是謂知學之本而得其要其學足矣其末有所不知亦何害乎學蘇子由曰六經之道惟其近於人情是以久傳不廢世之迂學乃曲為之說雖其義不至於此必勉強牽合

以為如此故其論委曲而莫通也夫聖人之為經惟
禮與春秋無一言之虛始得執定法度莫不可考然
猶未嘗不近於人情況乎詩者天下之人匹夫匹婦
羈臣賤隸悲憂愉佚之所為作也夫天下之人自傷
其貧賤困苦之憂而自述其豐美盛大之樂其言上
及於君臣父子天下興亡治亂之迹而下及於飲食
牀第昆蟲草木之類蓋其中無所不具而尚何以區
區繩墨求哉此亦足以見其志之不通矣夫聖人之

於詩以為其終要入於仁義而不責其一言之無當
是以其意可觀而其言可通詩有取象乎物以自見
其事有為此事而作而其言有及於是物者必強為
是物之說以求合其事蓋其為學亦已勞矣夫意有
所觸乎當時時已去而不可知故其類可以意推而
不可以言解天下之人欲觀於詩能不強為之說以
求合其作時之事則詩之義庶幾可以意曉而無勞
矣

張子厚曰置心平易然後可以言詩蓋詩人情性溫厚
平易讀者優游涵泳則津吻之間意味自出若自立
意見崎嶇求合愈求愈遠矣荀子云善為詩者不說
董子云詩無達詁孟子云不以文害辭不以辭害志
皆古之善說詩者

謝顯道曰明道譚詩並下一字訓詁只轉却一二字
點撥他念過便可教人醒悟古之詩章猶今之歌曲
歌曲常使人感動而學詩却無感動處者為泥章句

故也君子之於詩非徒誦其言又將以考其情性又將以考先王之澤蓋禮樂法度雖亡而詩猶能併其深微之意而傳之故學詩者當體會有味不在形容言語間也

游定夫曰學詩可以感發人心如觀天保則君臣之義修觀常棣則兄弟之愛篤觀伐木則朋友之交親觀關雎鵲巢則夫婦之經正昔周磐讀汝墳卒章而為親從仕王褒有至性而子弟廢蓼莪則學詩能感於

此可覩矣

陳同父曰道之在天下平施於日用之間得其性情之正者彼固有以知之矣當先王時天下之人其發乎情止乎禮義蓋有不知其然而然者先王既遠民之流也久矣而其所謂平施於日用間者與生俱生固不得而離也是以既流之情易發之言而天下亦不自知其何若而聖人於其間有取焉抑不獨先王之澤也聖人之於詩固將使天下復性情之正而得其

平施於日用之間者乃區區章句訓故之末豈聖人之心哉孔子曰興於詩章句訓故亦足以興乎吾願求所以興者

朱元晦曰本之二南以求其端參之列國以盡其變正之於雅以大其規和之於頌以要其止此學詩大旨也於是章句以綱之詁訓以紀之諷詠以昌之涵濡以體之察之性情隱微之間審之言行樞機之始則修齊治平之道得之此矣

讀詩之法宜虚心熟讀涵泳尋繹自然和氣從胸中
流出其妙處有不可得而言者不得安排措置自立
臆說亦不宜粘定舊解看得不流動也惟在吟詠諷
誦之間觀其委曲折旋之意如吾自作此詩自足以
感發吾心觀詩人意思好是如何不好是如何觀其
土俗人情觀其時勢物態如讀伐檀詩便見清高之
意看碩鼠詩便見暴斂之意好是如此吾心油然而興
起不好如彼心下著槍相似然後能得詩意有裨身

心今人只將已意包籠中間委曲折旋之意盡不曾
理會寧有濟乎且未看諸家注解先熟讀本文玩味
其語氣千遍萬過方見得其中好處其中好處方出
方見得精徹而無遺耳此亦貪多不得若讀一篇便
思讀第二篇則一二日可盡何用逐日捱得數章尚
未徹透耶故讀此篇恨不得常熟此篇如無第二篇
始可精進而無鹵莽之咎如入城郭須逐街坊里巷
屋廬臺榭車馬人物見過方是真知今人在外望見

城是如此便說我知之矣豈善讀詩者哉

丘仲深曰詩與易書春秋禮記並為五經其四經皆出自聖賢之制作刪述所以紀載聖君賢相大賢君子之言行事功惟詩多里巷田野匹夫匹婦懽悲怨怒之言甚或有淫泆悖亂之事使孤臣賤妾之詞與帝王聖賢之格言大訓並列以為經豈無故哉蓋以人之性情具於中志趣見於外必假言以發其心之所蘊志有所抑揚言不能無短長心有所喜怒言不能

無悲懽動於心而發於口有自然之理致有自然之音響天機自動天籟自鳴此詩之所以作也原於天理之固有出於天趣之自然作之者應口出聲賦之者隨宜應用或因之申吾不容已之情或由之發吾不可言之意或假之以明吾不易白之事章不必有定句句不必有定字言從理順聲和韻協固無所謂義例也又惡用訓詁為哉孔子刪詩為經雅言以教又謂誦詩可授之政可使命專對又教其子曰不學

詩無以言則是詩之為用可以達政事備問對資言
談也今觀三百五篇而律以諸儒之章旨訓解其間
言及於政事之施專對之用言談之助不多見間有
一二剡取而施用之亦自有限不知聖人何以云云
也觀孔孟子思之書所引旁及於禮記所載與夫左
氏春秋劉向說苑韓詩外傳諸書一一參考然後知
聖人讀書之法與後世拘於義例而局以訓詁者異
焉曾子述孔子之意作大學凡十引詩子思得曾子

之傳作中庸凡十二引詩孟子學於子思作書七篇
凡十二三引詩究其旨義多與諸儒所訓不全合可
見聖門教人讀詩必有所授受而出於義例訓詁之
外者三子相傳必有所自而左氏所賦漢儒所說亦
非無因後之學者必本孔曾思孟之所傳據論學庸
孟之所引為誦詩之要法章句訓詁諷詠涵濡察之
情性審之言行本朱子此言為讀詩之常法詩因於
事不遷事以就詩事寓於詩不遷詩以就事不銖銖

而析之不寸寸而較之取呂氏此言為用詩之活法
夫如此其於孔門學詩之法其庶幾乎昔子貢因論
學而知詩子夏因論詩而知學鳶飛魚躍子思以明
上下一理之察旱麓章吉果若是乎於緝熙敬止朱
子謂敬止無不敬而安所止也他日之訓解又何不
若是乎是知讀詩之法在隨文以尋意用詩之妙又
在斷章而取義也學者誠以是求諸三百篇則雅無
大小風無變正頌無商周魯苟意會於心言契乎理

事適其機或施之政事或發於言語或用之出使與凡日用施為之間無往而非詩之用矣固不拘拘於義例訓詁之末也

徐文長曰嘗閱孟德所解孫子十三篇及李衛公與唐太宗之所談說者其言多非孫子本意至論二人用兵隨其平日之所說解而以施之於戰爭營守之間其功反出孫子上以知凡書之所載有不可盡知者不必正為之解其要取吾心之所通以適於用而已

用吾心之所通以求書之所未通雖未盡釋也譬諸
痒者指摩以為搔未為不濟也用吾心之所未通以
必求書之通雖盡釋也譬諸痺者指搔以為搔未為
濟也夫詩多至三百篇孔子約其旨曰興而已矣曰
思無邪而已矣未嘗解之而其所以寓勸戒使人感
善端而懲逸志者自藹然溢於言外至於所解見於
魯論鄒書者若淇澳烝民裁數語耳他若唐棣志懷
也而以警遺巧笑美質也而以訂禮雄雉思君子也

而以激門人之進善是皆非正解者矣故說詩惟有
虛者活者可以吾心體度而發明之至於有事迹而
事迹已亡有典故而典故無考則彼之注已為臆說
我之訓豈為心解彼此互譏後先翻異不如姑闕其
疑無煩一一自為之說也

袁坤儀曰詩之為道正言若反寓言十九咏一物之微
而指陳甚大賦目前之美而寓意甚遠美言若慙怨
言若慕誨言若慙諷言若譽同一慨歎之詞而美刺

各異同一嘉樂之語而歡恨迥殊馮文所曰詩有理
語而不腐則生民抑戒之篇也有事語而不俚則七
月甫田之篇也有情語而不淫則卷耳喬木之篇也
徐儆弦曰詩言皆稽實待虛之言苟讀者有所感發
隨所玩習皆可有不讀陟岵而後可言事親讀
四牡而後可言事君也如王子擊好晨風而慈父感
悟裴安祖講鹿鳴而兄弟同食晨風鹿鳴亦豈父子
兄弟之詩耶李和伯於衡門悟處世於甫田識進學

可為學詩之法讀者隨觸而能自得思過半矣

徐元扈曰古人文詞逐一圓滿不待後人註脚諸經皆然至於讀詩全要領其不言之旨若一切粘皮帶骨全非詩理不了此義未可與言詩若是何也風人之致借有為機因無為用說處不是詩詩不在說處知其解者旦暮遇之

朱殷如曰詩三百篇大都忠臣孝子勞夫怨婦一倡三歎自是吐宮嚼徵今人胸中各有三百篇特古人先

獲我心耳奈箋疏師承畫為功今章句之間搜剔幾
窮文辭之外銷鑠殆盡一片家常話只做書讀過古
今志意萬山遮斷矣試從篝燈明滅更永人靜時取
一二章朗誦數過此際光景自然歡使舞悲使泣古
今人相去不遠此可明證故善說詩者以眼前作商
周以當身為作者即從箋疏師承討出本心疑信即
從文詞章句灼見古人肝腸誰謂刪後更無詩耶

范士文曰古人作詩虛實相因譬如車輪之轉非轂非

輻妙在於空又如鼓響於桴聲不在木火傳於薪光不在燼若將意思一句說盡便同嚼蠟無味

朱元晦曰看詩須并協韻讀便見得他語自齊整又更略知協韻所由來甚善或問吳才老之協韻何據曰他皆有據泉州有其書每一字多者引十餘證少者引兩三證然亦有推不去者因言商頌下民有嚴協不敢怠遑吳氏音嚴為莊云避漢諱却無道理其後讀楚辭天問見嚴字乃押從莊剛方字去乃知是叶

韻嚴韻作昂也又此間鄉音嚴作戶剛反天問才老
豈不讀往往偶失之古人情意溫厚寬和言語自恣
地好當時協韻只是要便於諷詠而已到得後來一
向於字韻上嚴切却無意思漢不如周魏晉不如漢
唐不如魏晉本朝又不如唐如元微之劉禹錫之徒
和詩猶自有相重密本朝和詩便皆不要一字相同
不知却愈壞了詩也叶韻恐當以頭一韻為準且如
華字叶音敷如有女同車是第一句則第二句顏如

舜華當讀作敷然後與下文珮玉瓊琚洵美且都皆
叶至如何彼穠矣唐棣之華是第一韻則當依本音
讀而下文王姬之車却當作尺奢反如此方是今只
從吳才老舊說不能又創得此例然楚辭紛余既有
此內美兮又重之以修能能音耐然後與下文紉秋
蘭以為佩叶若能字只從本音則佩字遂無音如此
則又未可以頭一韻為定也

陳氏經曰吳棫撰毛詩補音其說以為詩韻無不叶

者如來之為釐慶之為羗馬之為姣之類詩音舊有
九家唐德明始定為釋文燕燕以南韻心沈重讀作
尼心切德明則謂古人韻緩不煩改字揚之水以沃
韻樂徐邈讀沃鬱縛切德明亦所不載顏氏糾繆正
俗以傳毅郊祀賦穰有而成切張衡東京賦激有吉
躍切今之所作大略倣此其援据精博信而有證朱
晦翁注楚辭亦用械例皆叶其韻械又有韻補一書
不專為詩作也要之古人韻緩之說最為確論不必

一一改字

宋景濂曰人之生也則有聲聲出而七音具焉所謂七音者牙舌唇齒喉及舌齒各字是也知者察之分其清濁之倫定其角徵宮商羽以至於半商半徵而天下之音盡是矣然則音者其韻書之權輿乎夫單出為聲成文為音音則自然協和不假勉強而後成虞廷之賡歌康衢之民謠姑未暇論國風雅頌四詩以位言之則上自王公逮小夫賤隸莫不有作以入言

之其所居有南北東西之殊故所發有剽疾重遲之
異四方之音萬有不同孔子刪詩皆堪被之絃歌者
取其音之協也音之協其自然之謂乎楚漢以來離
騷之詞郊祀安世之歌以及於魏晉諸作曷嘗拘於
一律亦不過協比其音而已自梁之沈約拘於四聲
八病始分平上去入號曰類譜大抵多吳音及唐以
詩賦設科益嚴聲律之禁因禮部之掌貢舉易名
曰禮部韻略遂至毫髮勿敢違背雖中經二三大

儒且謂承襲之久不欲變更縱有患其不通者以不出於朝廷學者亦未能盡信惟武夷吳棫惠之尤深乃稽易詩書而下達於近世凡五十家以為韻補新安朱熹據其說以協三百篇之音識者猶或信之而韻之行世者猶自若也嗚呼音韻之備莫踰於四詩詩乃孔子所刪舍孔子弗之從區區沈約之是信不幾於大惑與司馬光有云備萬物之體用者莫過於字包衆字之形聲者莫過於韻所謂三才之道性命

道德之興禮樂刑政之原皆有繫於此誠不可不慎也古者之音惟取諧協故無不相通江左制韻之初但知縱有四聲不知橫有七音故經緯不交而失立韻之原往往拘礙不相為用宋之有司雖嘗通併僅稍異於類譜君子患之雖然旋宮以七音為均均言韻也有能推十二律以合八十四調旋轉相交而大樂之和亦在是矣

黃才伯曰字音以喉齒牙舌唇為宮商角徵羽其入樂

也則以清濁高下而諧不因乎字故樂之五音與字音不同如鹿鳴之詩首呦字為黃鐘清宮次呦字為南呂羽音沈括言古之善歌者使聲中無字字中有聲凡曲止是一聲清濁高下如縈縷爾字則有喉牙齒舌等音當使字字舉皆輕圓融入聲中令轉換處無磊塊此謂聲中無字古人謂之累累如貫珠今謂之善過度是也如宮聲字而曲合用商聲則能轉宮為商歌之此字中有聲也朱子儀禮經傳詩樂篇正

是沈氏之意今以呦呦二字為例其餘當觀全譜由此言之聲相應故生變兼為樂之五音亦可槩見矣如闕雖以無射清商起調首闕字後兩參字是也以無射清商畢曲首速字次側字末之字是也此歌詩法也樂記所謂變成方謂之音是已

楊用修曰吳才老嘗著詩補音楚辭釋音韻二書皆古音也余嘗合而觀之有當從而無疑者有當疑而闕者有必去而無疑者如舍之音署下之音虎馬之音

母有之音已福之音偏見於易象不一而足服之為
房六切見於詩者凡十有六皆當為蒲北切而無與
房六叶者友之為云九切見於詩者凡十有一皆當
作羽軌切而無與云九叶者此類當從而無疑者也
朝一也既叶為周又叶為署為除夜一也既叶為御
又叶為灼為液此類當疑而闕者也至若騶虞一詩
既以虞叶為牙而合貳為韻下章又以牙叶為五紅
而合蓬韻不知古詩末句同者多不叶如文王烝哉

之例也行露一詩既強以牙叶為五紅又強以家叶
為各空切以合其韻不但已也又以家叶作谷以合
獄屋之韻則辭不達言不順苟以赴韻而已豈古人
自然之文哉且詩一人之作一方之言而二章之間
詎分二音是非古音也其為臆說決矣此類當去而
無疑者也考詩之音韻有如字讀而自可叶者如棘
心天天母氏劬勞勞叶僚今按勞自可叶天不必改
音我思肥泉茲之永歎歎叶他涓切今按歎音灘自

可叶泉不必改音出自北門憂心殷殷門叶眉貧切
今按門自可叶殷不必改音四牡有驕朱幘鑣鑣驕
叶高今按驕自可叶鑣不必改音吳才老必欲改之
者以勞在豪韻夫在蕭韻故改勞為僚以就天泉在
先韻歎在刪韻故改泉為他涓切以就泉門殷驕鑣
之改音意亦如此他如揚且之類為魚堅切鶉之奔
奔為逋珉切凡百餘字聊舉以例其餘皆改古韻以
趣沈約之韻也不思古韻寬緩如字讀自可叶不必

過矯屬齒况四聲分在齊梁間成周之際寧知有沈
約韻哉嘗慨春秋三傳之祖也反以三傳疑春秋孟
子班爵祿章王制之祖也反以漢人王制周禮疑孟
子不合詩騷音韻之祖也反以沈韻改詩騷俗學之
謬如此

徐元扈曰音韻相傳終古不變古人止用其方言稱情
而作並無窒碍今以南人之音讀北人之文自然齟
齬乃動稱古叶不敢致問果爾則古又當另有一種

韻書出於方言謠俗之外而當時婦人女子田夫牧
豎皆能暗誦用以作詩必無此理

予友朱康流說詩簡該雋永予嘗質難今錄其讀詩略
記總論曰詩義至於今日幾如聚訟作者愈繁傳會
愈甚而本旨愈不可詰小序最為近古雖不出於作
者之自為大抵採詩者據所聞而記其略也後人增
益或失初旨觀亡詩六篇僅存首語則首語作於未
亡之前其不作於既亡之後明矣予由獨取初辭頗

為得之然思之不精仍多狃於舊聞其獨創之說又
詭詭而不安宜其見斥於晦翁也至晦翁之釋詩又
因後人之失其傳并初辭而廢之是猶飯與砂同棄
蕭與蘭並焚矣夫易以發揮理義猶曰書不盡意況
詩以涵泳性情者乎故詩人美刺之意有見於文辭
之中者亦有寄於文辭之外者如必執文辭以求之
是孟子所謂害志者也集傳既廢小序惟以已意揣
摩於是舉諸刺詩半屬其人自為似則似矣然春秋

之初風教未至大壞即有安於為惡而不慚者大抵
在上之人舉國中一二數而已人猶痛惡而刺之况
在下者敢作為詩歌播之里巷者乎且出於其人之
自為則如桑中靜女諸篇順情從懷而出之亦不足
以為詩出於刺者之口反覆而嗟歎之於此無所嫌
於彼有所警也乃曰未有刺於其人之惡而反效其
人之言以自陷於所刺之中者獨不曰擯其人之惡
而反錄其人之詩適以自悖其所擯之意乎使孔子

生於漢唐以後則狹邪游冶之篇又何可勝錄也晦翁胸中坦然平易無所曲折言理則得之言情則固有未盡者故三百篇之中集傳所得者國風十之五小雅十之七大雅頌十之九而後人好異乃欲盡舉而易之則又過矣

詩之有美刺猶春秋之有褒貶也觸於見聞發於性情豈如後人之夸諛為佞詆訐為戾者乎晦翁與東萊論辨淫奔之詩終不能合晦翁之義雖正東萊之

說亦未為非也晦翁所嫌者發人閨門隱僻之事非
溫柔敦厚之道然居民上而載高位者肆然宣淫而
無忌君子處其國安能默默而已若新臺牆茨諸篇
已不勝喋喋所不可解者桑中靜女之詩若為流連
佚蕩之語似乎勸之然靜女序曰刺時則是借男女
以寓言略如楚辭所云其不為刺淫明矣惟桑中序
曰刺奔而左傳亦稱桑中之喜其為淫奔之事無疑
而玩其詞氣知詩人之所刺者其意也尚未有其事

未有其事而有其意不可不扶而破之也蓋詩有刺
其人者亦有刺其俗者刺其人者如衛宣公公子頑
之類是也刺其俗者如桑中溱洧之類是也大抵衛
之沫鄉歲有游觀一若鄭之溱洧皆士女咸集車馬
駢填流風相習以為樂事而不覺其非於鄭則著其
事者罪累上也於衛未有其事則指其心而斥之曰
是將無所不至苟使自好之士聞之必有動於中廢
然而自反矣則其為流連佚蕩之語者正所以愧之

倣之亦復何嫌而何避乎以是言之信乎東萊之說
未為非也不然季札論樂至於邶鄘衛盛稱其美而
無貶辭於鄭則僅譏其細而不及淫豈詩之邪者已
黜於未刪之前而反收於既刪之後乎必不然矣晦
翁續楚辭若高唐諸賦猶斥而不錄又何疑於夫子
晦翁以鄭聲淫即此鄭風而是辨之者曰音律為聲
篇章為詩辭旨醇正而節奏放濫即為淫聲辭旨佚
宕而節奏緊嚴即為正聲不得以聲而累辭也如樂

記云商為五帝之聲商人傳之齊為三代之聲齊人
識之此與商頌齊風何涉其言亦至辨矣然在歌者
或可變易其聲而非所語於作者也作詩之人以哀
心感者其辭淒涼其聲亦淒涼以樂心感者其辭發
越其聲亦發越以喜心感者其辭和柔其聲亦和柔
以怒心感者其辭陵厲其聲亦陵厲以敬心感者其
辭莊直其聲亦莊直以淫心感者其辭怛蕩其聲亦
怛蕩此志氣之相因發於自然而不自知者也苟舉

其聲而變易之即不足以達志不足以達志亦不足以感人不足以感人即聲之正者亦不足以為樂矣故詩三百一言以蔽之曰思無邪思無邪辭亦無邪也聲亦無邪也樂記所謂鄭衛之音亂世之音也者此惟在其本國則有之或流傳於他國則有之魯秉周禮採之列國以為樂者其淫詞淫聲不待夫子之正久已斥去而不用故季札歷觀列國之樂而不及一聞也其所存之辭皆正辭所存之聲皆正聲雖未

嘗用之宗廟至於燕饗賓客歌之以相贈答者班班可考也如鄭之子展子太叔子蘧晉之叔向趙孟韓宣子春秋之賢大夫也當時歌之以見美者即晦翁所謂淫風豈其勸獎淫佚以為風尚者乎夫子之所取即向者賢士大夫之所美者也夫子之所去即向者賢士大夫之所斥者也夫子豈有以異於人乎特加之詳審集其大成已耳

風之所以異於雅雅之所以異於頌者非特家國天

下朝廷宗廟之分亦其音律之變不得比而同之也
音律之傳已無所考鄭氏十二詩譜亦未可盡信凡
調以此始者必以此終首尾何聲即屬何調誠如是
則宮調之中商多於宮何得仍為宮商調之中宮多
於商何得仍為商乎余以為調也者韻也古人雅淡
不為繁聲慢辭大抵一句之終則曳其音以永之而
已平聲最長其濁者為宮清者為商上聲次之為角
去聲次之為徵入聲最短為羽後世易之以屬舌喉

齒牙而五方之音不可強齊故今之歌者平仄不協
清濁不調不可以歌而喉舌之間不甚致辨則亦可
以因俗而識雅因今而知古矣以此推而究之絕學
或可復明古調或可再作乎或曰關關雎鳩四字皆
屬平聲之清殆難播之絲竹曰古人諧聲存乎通變
如易之象不可典要也泮水次章四聲通叶當時自
有轉借之法今不可以盡知亦不可以意會也至以
人聲而播之絲竹其無定音愈可知矣無定音則無

定律亦愈可知矣

古者作詩有賦有比興而用詩亦有賦有比興射義天子以騶虞為節樂官備也豈不以騶御虞人罔不在列乎諸侯以貍首為節樂會時也豈非以貍首至薄可以薦嘉賓乎是其指事也切其取義也直如作詩者之賦體是也至云大夫以采蘋為節樂循法也士以采芣為節樂不失職也以婦女之循法喻大夫之循法以婦女之不失職喻士之不失職非比乎以

蘋蘩蕒藻之菜筐筥錡釜之器喻大夫士明信之將
非興乎然其間亦有不可解者鄉飲酒以及燕射之
禮其合樂皆歌周南之關雎葛覃卷耳召南之鵲巢
采芣采蘋他詩無或及者其於詩義又何所取何所
去也至於肆夏之三宗廟之詩也而叔孫豹以為天
子享元侯用之文王之三周家受命之詩也而叔孫
豹以為兩君相見用之以燕享而于宗廟之樂何以
不嫌於瀆以諸侯而干天子之樂何以不嫌於僭鄭

康成曰饗賓或上取也蓋古之嘉禮吉禮固上有攝
一等之例如昏禮士乘墨車是上攝大夫也祭統夫
人副禕立於東房是上攝王后也則樂亦或如之顧
以夫人而上攝王后亦後世之僭禮況諸侯而可上
攝以偁天子乎三家者以雍徹夫子已明譏之而燕
居篇記夫子之言曰兩君相見升歌清廟下管象武
客出以雍徹以振羽他不具論即以雍之一詩言之
相維辟公天子穆穆既無取於三家之堂矣又何取

於諸侯之宮也或曰他事為借用徹則為正用借用
則可正用則不可然與否與若自邶至豳十三國風
無一見用於古禮者故程泰之謂十三國風俱不入
樂徒歌而已則季札觀樂於魯工之所歌或稱其大
或譏其細或美其泱泱或美其漉漉是豈獨以人聲
論者安得謂其不入樂也總之三百五篇意寄深遠
苟以比興之義觸類而廣通之則國風之被於樂何
所不可雖亂世之音怨怒既經夫子刪定而後是皆

近於和平者矣豈復煩後人別擇去取於其間哉儀
禮殘缺十存一二周官一書已為後人汨亂至小戴
所記精義不乏而踏駁亦時有之雖出聖人之言恐
或猶有未定如執殘缺汨亂踏駁之書以其所及言
謂為禮之所用而不察詩義之所格以其未及言者
謂為禮所不用而不察詩義之所通亦何異於管窺
之見也

小箋私記余讀易謂易本言天道而總歸人事其人為

君臣父子之倫其理為盈虛消息之幾其端在身心
家國之間而其體在戒懼慎獨其用在通經達變自
語默動靜之微以及治亂興亡之大無不由之是卦
有六十四卦又有三百八十四爻皆以理數象變救
正人事也今於詩亦然其體風雅頌其義賦比興其
俗有東西南朔之殊其事有朝野大小之異其音有
宮商角徵羽之辨其旨有正反常變美刺勸懲之不
同其引類有天地時數山川人物之繁夥而究其所

歌咏者喜怒哀樂之情家庭骨肉之事所告誡者興
亡理亂之由悲懼離合之故所稱述者開國承家之
業頌禱者凝庥永命子孫長久之謨極之忠臣義士
怨婦勞人咨嗟太息以盡其痛哭流涕者皆不外此
則詩之為詩不獨聲音合律文章葩美而聖人所以
垂經著教者可以思矣

帝舜之贊禹也曰克勤克儉予謂聖賢學問大要不
出勤儉二者友人聞而疑之予曰非禮勿視四語豈

不是勤豈不是儉友人愕然真所謂索解人不可得也今讀三百篇無一非勤無一非儉以小心謹慎為根柢以夙夜黽勉為工夫以縱慾敗度為大戒以盡心於君父民物時時得宜者為宏功保蓄精神凝合天命愛養物力始終弗替則學問之道治平之理至矣備矣夫勤儉豈外日用事物間哉亦豈僅在一事一物間哉苛察為明繁瑣失度勤矣而不可云勤貪嗇褊急厚取薄施儉矣而不可云儉詩人微旨亦寓

於意言之表學者當自悟之

世人妄言曠達矜高自異今觀聖人所採擇以為咏歌者何嘗有一曠達語耶諄諄然稱述祖宗創業之艱難天命人心之不易保而欲子孫賢多世守高曾之規矩無忘天人交與之故慎持於天下國家之間耳讀詩者體此意於情文律呂名物象數之中則一經可通六經六經可會一經用之修身齊家治國平天下不必論其時遇之窮通險易事理之順逆繁簡

人物之遠近親疏自有以不辱身命不辱名教不辱君父不辱蒼生一以致之矣程子曰窮經將以致用豈虛語者哉

詩與春秋相表裏春秋以褒貶為賞罰詩以美刺為勸懲是二者聖人寓治世之權於經術中者也夫有美而無刺有可勸而無可懲固聖人之所樂然而不能者以人有私利之念為之患耳為人而輕身忘家固不可私身利己尤不可蓋私利之念勝則踰閑越

檢至於汗漫而不可收拾故既譽揚其盛美而又訶
詆其醜厲闡發隱秘摸寫中曲令人知顯貴如彼而
人猶斥之幽暗如此而人猶暴之能不惕然以思憬
然而悟乎後世之詩聯辭綴韻不過風花月露於事
何益若夫哀淫愁怨導慾增悲非徒無益抑且傷化
邵子曰詩從刪後更無詩正謂此也詩亡然後春秋
作詩與春秋相因為用而天下治矣

為人而怠棄先業則水木本源之意絕故詩常稱述

祖德以動之為人而專恃先世則有初鮮終之患生
故詩常言勉強學問以勗之苟能修德承先即可上
契天帝下洽民物而啓後人矣夫人不懈幽獨始可
日進高明不欺矜寡始可光被遐邇故詩之所美必
光明俊偉有益於天人者也詩之所刺必陰詭回遁
見棄於天人者也詩人用心大概如是餘可類推而
知

周以農事起家常以農事勸勉蓋稼穡艱難小民之

依君民大事莫此若也號文公之論諄諄詳切則媚
神和民享祀時至而布施優裕者俱本是為當急豳
風七月徵於民俗楚茨大田見於君公而載芟良耜
形諸頌禱何為殷殷乃爾乎孟子曰民事不可緩於
是可見

人得遂其願則樂不遂其求則憂其常也故有待於
於人者有藉慰於上者能曲盡其情各慰其私而更
有幸出望外非意之獲則為之歡愉鼓舞歌頌樂道

有不期然而然者矣然人處倫常事物間遇順意時
當待之以理遇逆境時亦當制之以理理所難處則
歸之數及乎反躬引咎呼天呼父母亦其心之無可
如何者所謂知其不可而安之命也知其不可而鳴
號之亦命也詩人有鬱於中或為嗟咨或為涕泣感
慨悲憤莫知所措此豈其得已者哉故曰聖人之情
見乎辭

詩之憂多而樂少者何也天下治日常少而亂日常

多君子與小人相持而君子常患於不勝當盛治之日而亂幾即乘之君子在朝用事而小人蘖芽其間此幽顯微著之理皆詩人所兢兢焉深慮者也詩人有善善長惡惡短之心稱人善雖至隱必闡揚之言人過雖已形必婉諷之至於有治定之業則鋪張勲德以示勸有喪亡之憂則推原禍本以垂戒或冀望時君或切責臣下布之朝野告之神明寓規於頌因時立言皆有忠厚悱惻之意而履霜堅冰尤其深切

而莫追聖人刪詩自不厭其言之多耳

孔子刪詩正樂在魯哀公十有二年左氏所記春秋時君卿大夫燕享贈答所引用者俱在定公四年之前季明德沈子起謂其所賦之詩非孔子刪正之篇不可據為古經之證今考當時引用之詩斷章取義不可拘固以觀也樂之當正或有歌此燕樂音節相傳當時遂襲為常不知所用之宜如天子之饗元侯者而及之使命兩君相見所歌者而施於下臣王者

歌之以徹祭者而僭自大夫孔子安得不為之釐正
乎若子展子太叔子蘧諸名卿所賦義有取爾以其
未經孔子刪正為不足據而何以河水轡之柔矣新
宮祈招車乘周道挺挺我無所監等詩不概列於三
百篇也則今之所存者經孔子之刪正而三百篇見
於左氏紀載者亦可引為釋經之助

六經為載道之文俱按事陳理直切指示而詩原本
性情宣達志氣託諸形容寓言物外別是一種文字

非若他經可執猶元美所云草木中之松竹鳥獸中之龍魚也當其天然而發如孩笑谷音隨遇成節及乎有感而動如水衝石激觸目生心此在作者難於明言而讀者亦不能遽曉也是不必假象造語以釋之引繩切墨以究之而當息心靜氣以觀之亦若啓其天機而調其六情者蓋義類紛披而紬繹宜閒物色錯陳而析辭尚簡使其味津津欲吐情眈眈若新則達人妙悟不於此見耶

記曰溫柔敦厚詩教也故詩之失愚溫柔敦厚而不
愚則深於詩者也此言詩之為教有異而即教人以
學詩之方也欲學詩必先曉此四字之義冲容有度
曰溫辭氣和婉曰柔渾合不佻曰敦含蓄不露曰厚
四者不備不可為詩四者不具亦不可與言詩故於
詩當求其忠厚和平一倡三歎之妙使其辨言過理
靡麗過美而與情義相遠遠雖日與古來說家爭黃
角綠競勝較奇而高心矜氣豈有當於詩人之微旨

乎然詩有辭意深長典則奧博者學者不能好學深思畏難就易徒事於波靡殊少風雅之致太鄰於涉獵不通詩史之情則三百篇不過與後代之里謠塞曲宮詞獵賦鼓吹祠樂等耳又豈聖人刪詩獨存三百之意乎故曰溫柔敦厚而不愚則深於詩者

宋人有詩話而詩不振信乎木涇公之言也升菴謂有宋諸家之賤杜詩句必有所指篇必有所屬如商度隱語豈復有詩哉謂之不振亦宜愚繹詩之為經

至實而虛最正而奇其微妙須人自會一涉口耳手
筆便成筌蹄若泥文略意則買櫝之見也憑臆牽辭
則鏤舟之求也然古人歌咏必非無因後人流覽亦
期有合則循章按句貴乎確證發明令其字字消釋
篇篇安頓始可無憾不得概謂無所指無所屬也多
聞闕疑聖賢不免若一切泛視含糊籠侗自非學人
所宜耳

詩所由作不出情事用三者喜怒哀怨忻感感觸而

發情也政事得失倫物臧否風俗淳漓事也為朝廷
宗廟房中之樂而歌之相見會同郊祀燕饗田獵報
賽用也及乎世遙年久情隨境湮事與數殊用亦緣
時遠而不可考惟序之首句原其意旨題諸簡端以
示後世孔子未刪以前三千餘篇皆有此一句使國
史當採詩之時無此一語誰能於數百年之後遙揣
而懸擬之乎世之遵序者謂此孔子子夏所作序
者謂傳益臆決之詞二者皆非也序首一語片言居

要不瑣述詩中之詞而推原詩前之意其理明切推
隱而可以知著其語淵微舉近而可以見遠故其間
有難讀者略與詩等而神明其故大與詩合即朱子
釋詩亦多收攝其意是序本古初而不可輕廢者首
語而外出於後人之增益穿鑿支離不必盡信也

世有盛衰詩亦有升降此亦文運與世運相因者也
讀者詳其文而測其意千百年之異同自見而說者
有四始五際之要

其說以卯酉午戌亥為五際天保
為卯祈父為酉采芑為午大明為

亥亥為革命一際也辰為天門出入聽候二際也卯為陰陽交際三際也午為陽謝陰興四際也酉為陰盛陽微五際也大明在亥為水始四牡在寅為木始嘉魚在巳為火始鳴雁在申為金始復有四始缺五際凡之語皆後人推測私見古人作詩時未嘗有此也詩不可以文害辭不可以辭害志豈復可求多於文辭之外乎唐詩不可以初盛中晚論而三百篇更何論乎

子貢詩傳亦嘗有合於詩志未可竟斥置之然純繆牽合往往而有大約因夫子可與言詩一言而附託

之耳其初世不槩見始盛於嘉靖之初如黃泰泉李彭山雖未深信亦或取焉豐一齋著魯詩正說信之最深子南畝任誕多才又加緣飾是書嘗至亂真若定之方中其尤著者也朱康流辨之甚審有識者不可執一而詳觀焉

孔孟之後為故訓之學者魯申公而下凡七家為傳注之學者子贛而下凡三十二家為義疏之學者梁武而下十有八家其他如劉公幹王肅以還二十二

家為問辨侯芭郭璞而後三十二家為統說若夫名物則陸蔡五家圖譜則鄭歐十家音與緯有八自劉芳徐邈始何其多也迄今世遠人遙載籍不備而家藏甚少聞見不詳所覩記者止此市肆所得與親友所假而已蓋言不期多寡貴乎當理注弗問異同在於傳經今儒士好辨文人尚辭傳注簡而寡義箋疏詳而遠性考證但支離而莫斷質疑愈紛雜而莫信則欲窮經而經愈亡矣書曰詩言志必有志而後有

詩孟子以意逆志是為得之必得其志而後可以得
詩予不敏何敢以已意為可得詩志乎詩序近古未
必無據先儒祖述已久因辭測志因序測詩其有未
慊參衆見而權衡之如彼飛蟲時亦弋獲庶幾愚者
之一得云

待軒詩記卷首